

CONVENIO DE COLABORACIÓN ENTRE A ENTIDADE PÚBLICA EMPRESARIAL AUGAS DE GALICIA, O CONCELLO DA CORUÑA E A EMPRESA MUNICIPAL AGUAS DE LA CORUÑA, SA (EMALCSA) PARA A XESTIÓN E EXPLOTACIÓN DA PRESA E ENCORO DE CECEBRE.

Ethel María Vázquez Mourelle, conselleira de Infraestruturas e Mobilidade, en nome e representación da entidade pública empresarial Augas de Galicia, na súa condición de presidenta da citada entidade, no exercicio das funcións atribuídas polos artigos 13 da Lei 9/2010, de 4 de novembro, de augas de Galicia e 6 do Estatuto da entidade pública empresarial Augas de Galicia, aprobado polo Decreto 32/2012, do 12 de xaneiro.

Inés Rey García, alcaldesa do Concello da Coruña, no exercicio das atribucións conferidas polos artigos 124 da Lei 7/1985, do 2 de abril, reguladora das Bases do Réxime Local e 61 da Lei 5/1997, do 22 de xullo, reguladora da Administración Local de Galicia e como presidenta da Empresa Municipal Aguas de La Coruña, SA (EMALCSA), de conformidade co artigo 13 dos Estatutos Sociais de EMALCSA aprobados polo Pleno do Concello da Coruña na sesión que tivo lugar o 2 de xullo de 2007.

Todas as partes intervenientes recoñécense capacidade para subscribir o presente convenio polo que

EXPOÑEN

Primeiro.- Que a entidade pública empresarial Augas de Galicia, adscrita á Consellería de Infraestruturas e Mobilidade da Xunta de Galicia polo Decreto 26/2019, do 7 de marzo, polo que se establece a estrutura orgánica da Consellería de Infraestruturas e Mobilidade, é o ente do sector público autonómico galego ao que lle corresponde exercer as competencias e funcións en materia de auga e obras hidráulicas nos termos establecidos na Lei 9/2010, do 4 de novembro, de augas de Galicia e no Decreto 32/2012, do 12 de xaneiro, polo que se aproba o Estatuto desta entidade.



Segundo.- Que o concello da Coruña, de acordo co artigo 25 da Lei 7/1985, do 2 de abril, reguladora das Bases do Réxime Local, ten atribuídas as competencias en materia do subministro de auga, debendo prestar, entre outros, de conformidade co artigo 26 desta Lei, o servizo de abastecemento domiciliario de auga potable.

O artigo 85 desta Lei reguladora das Bases do Réxime Local, habilita para a xestión dos servizos da competencia local mediante algunha das seguintes formas que nel se sinalan:

“A. Gestión directa:

a) Gestión por la propia entidad local.

b) Organismo autónomo local.

c) Entidad pública empresarial local.

d) Sociedad mercantil local, cuyo capital social sea de titularidad pública.

B. Gestión indirecta, mediante las distintas formas previstas para el contrato de gestión de servicios públicos en la Ley de Contratos del Sector Público”.

Terceiro.- Que a Empresa Municipal de Aguas de La Coruña, SA é unha sociedade mercantil propiedade do Concello da Coruña cuxo obxecto social é, entre outros, a prestación do servizo de abastecemento de auga potable.

Cuarto.- Que o Concello da Coruña é o titular da concesión de augas outorgada mediante resolución de data 24 de setembro de 1973, pola Dirección Xeral de Obras Públicas do Ministerio de Obras Públicas, de 928 l/sg de caudal, a captar dos ríos Mero e Barcés, nos termos municipais de Abegondo, Cambre e outros, mediante a construción dun encoro no lugar de Cecebre, con destino á ampliación do abastecemento da poboación.

Que a antedita concesión materializouse na construción da presa de Cecebre, situada na confluencia dos ríos Mero e Barcés, no termo municipal de Cambre, e do encoro de Cecebre, situado nos concellos de Carral, Betanzos e principalmente Abegondo, sendo o abastecemento de auga ao Concello da Coruña cos recursos hidráulicos dos citados ríos Mero e Barcés o que motivou a creación desta infraestrutura hidráulica.



Quinto.- Que de conformidade co establecido no Real Decreto 2792/1986, do 30 de decembro, sobre traspaso de funcións e servizos da Administración do Estado á Comunidade Autónoma de Galicia en materia de obras hidráulicas, esta Comunidade subrogouse nos dereitos e obrigas do Estado en relación coas obras e instalacións hidráulicas que se relacionan nos anexos desta norma de traspaso. Así, as obras e instalacións derivadas da concesión hidráulica do encoro de Cecebre con destino a abastecemento de poboación foron entregados á Comunidade Autónoma de Galicia, de acordo co apartado e) do anexo I do Real Decreto relativo aos bens, dereitos e obrigas que se traspasan.

Sexto.- Que ao abeiro do disposto no Regulamento Técnico de Seguridade de Presas e Encoros, aprobado pola Orde Ministerial do 12 de marzo de 1.996, que establece a obrigatoriedade de redactar unhas normas de explotación para garantir a seguridade da presa, Augas de Galicia procedeu á súa elaboración, tramitación e aprobación, mediante resolución da presidencia de Augas de Galicia de data 3 de maio de 2010.

En cumprimento da normativa e de acordo ao establecido no convenio de colaboración asinado o 28 de agosto de 2012 entre a entidade pública empresarial Augas de Galicia, o Concello da Coruña e a Empresa Municipal Aguas de La Coruña, SA (EMALCSA) para a xestión e explotación da presa e encoro de Cecebre, EMALCSA redactou una proposta de modificación das Normas de Explotación que foi aprobada por Augas de Galicia mediante resolución de data 29 de xullo de 2013.

Sétimo.- Que de acordo coa Directriz Básica de Planificación de Protección Civil ante o Risco de Inundacións, aprobada por acordo do Consello de Ministros do 9 de decembro de 1994, que establece a necesidade de elaborar e implantar un plan de emerxencia nas presas clasificadas nas categorías A e B, Augas de Galicia procedeu á súa elaboración, tramitación e aprobación mediante resolución da presidencia de Augas de Galicia de data 3 de decembro de 2011.



Que por resolución do Presidente de Augas de Galicia do 14 de xuño de 2004 a presa de Cecebre foi clasificada na categoría A, en función do seu risco potencial.

En cumprimento da normativa e de acordo ao establecido no convenio de colaboración asinado o 28 de agosto de 2012 entre a entidade pública empresarial Augas de Galicia, o Concello da Coruña e a Empresa Municipal Aguas de La Coruña, SA (EMALCSA) para a xestión e explotación da presa e encoro de Cecebre, EMALCSA redactou una proposta de modificación do plan de emerxencia da presa de Cecebre que foi aprobada por Augas de Galicia mediante resolución de data 13 de marzo de 2014.

Oitavo.- Que tanto o Real Decreto 9/2008, do 11 de xaneiro, polo que se modifica o Regulamento do Dominio Público Hidráulico e que introduce un novo título regulador da materia de seguridade de presas, encoros e balsas de auga, como a normativa antes citada, o Regulamento Técnico sobre Seguridade de Presas e Encoros e a Directriz Básica de Planificación de Protección Civil ante o Risco de Inundacións, establecen os conceptos, as competencias dos distintos órganos sobre esta materia e as obrigas respecto destas infraestruturas hidráulicas.

Estas normas recollen, entre outras, as funcións e obrigas do titular das presas, encomendándolle a responsabilidade do estrito cumprimento das normas de seguridade en todas as súas fases, e contemplan expresamente a posibilidade de cesión da explotación dispoñendo para este suposto que, cando a explotación da Presa sexa cedida ou arrendada a outra entidade ou persoa física ou xurídica, o cesionario ou arrendatario asumirá as obrigas do titular.

Noveno.- Que na condición nº 11 da resolución concesional da Dirección Xeral de Obras Públicas do Ministerio de Obras Públicas, pola que se outorga ao Concello da Coruña, a concesión de augas de 928 l/sg de caudal, a captar dos ríos Mero e Barcés, recollese a necesidade de construír unha escala de peixes co obxecto de salvar o obstáculo que a presa supón para as especies piscícolas.



Con posterioridade efectuouse a tramitación ambiental relativa a este aproveitamento e para dar cumprimento ao disposto, levouse a cabo unha análise das diferentes alternativas posibles a seguir para salvar este obstáculo, co fin de facilitar a migración dos peixes do río onde se atopa e resolver a mala conectividade ecolóxica neste sistema fluvial.

Logo desta análise considerase a opción mais axeitada para darlle solución á problemática a consistente na instalación dun capturadoiro para peixes, unha gaiola ou artesa que os elevará augas arriba do obstáculo cunha certa periodicidade, acorde ao número de migradores atrapados no capturadoiro.

Décimo.- A Comunidade Autónoma de Galicia, de conformidade co disposto na alínea tres do artigo 26 da Lei 6/2003, do 9 de decembro, de taxas, prezos e exaccións reguladoras da Comunidade Autónoma de Galicia na súa redacción modificada pola Lei 12/2011, do 26 de decembro, de medidas fiscais e administrativas, estableceu unha taxa á que están suxeitos os beneficiados polas obras de regulación dos recursos hídricos xestionadas pola Administración Hidráulica da Comunidade Autónoma de Galicia financiadas total ou parcialmente con cargo aos orzamentos da Comunidade Autónoma de Galicia coa finalidade de compensar os custos da inversión que soporte a dita administración e de atender aos gastos de explotación e conservación de tales obras.

Esta normativa establece como suxeitos pasivos da taxa ás persoas naturais ou xurídicas e ás entidades beneficiadas polas obras de regulación, dispoñendo literalmente “*Os beneficiados polas obras de regulación dos recursos hídricos xestionadas pola Administración hidráulica da Comunidade Autónoma de Galicia, con captacións situadas augas abaixo dos encoros xestionados por Augas de Galicia e/ou que capten directamente do encoro, financiadas total ou parcialmente con cargo aos orzamentos da Comunidade Autónoma de Galicia, sempre que non teñan asumida a explotación, conservación e mantemento destes encoros, satisfarán a tarifa 68 da modalidade de actuacións profesionais incluída no anexo 3, coa finalidade de compensar os custos do investimento*”



que soporte a dita administración e de atender os gastos de explotación e conservación de tales obras.”.

A resolución de data 24 de setembro de 1973, xa citada, pola que se outorga ao concello da Coruña a concesión de abastecemento ao concello recolle no seu condicionado a suxeición da concesión ao pagamento de taxas ou do canón que no seu momento puidera establecerse con motivo de obras de regulación da corrente do río realizadas polo Estado ou por particulares ou entidades que deban reverter ao Estado.

Décimo primeiro.- Que a sociedade Minicentrales Eléctricas de Galicia, S.L. é titular dunha concesión con destino a aproveitamento hidroeléctrico no río Mero, dun caudal máximo derivado de 9.000 l/sg, no concello de Cambre (11/122/2), outorgada mediante resolución da presidencia de Augas de Galicia de data 17 de setembro de 1998, e co proxecto construtivo aprobado mediante resolución da presidencia de Augas de Galicia do 29 de abril de 2004.

Este aproveitamento, que pretende o turbinado do caudal vertido polos desaugadoiros do encoro de Cecebre previamente a ser captado para o abastecemento da poboación da cidade de A Coruña, esta supeditado ao uso de abastecemento da poboación non podendo verse afectadas ás funcións de explotación que ten atribuídas a sociedade EMALCSA. Neste senso toda a normativa sectorial en materia de augas establece a preferencia do uso de abastecemento sobre o uso hidroeléctrico, recolléndose tamén expresamente no propio condicionado concesional deste aproveitamento.

Décimo segundo.- Que a entidade pública empresarial Augas de Galicia e o Concello da Coruña e a Empresa Municipal de Aguas de La Coruña, S.A. (EMALCSA), vistos os antecedentes expostos, en atención ás súas competencias e obrigas, e conscientes da necesidade de conseguir unha correcta e axeitada xestión e explotación desta presa, de xeito que se garanta o seu bo funcionamento e a seguridade da mesma, tanto en situacións normais como extraordinarias, consideran conveniente a redacción dun Convenio que



regule as relacións que os vinculan en base ás súas competencias e funcións respecto da xestión, explotación, conservación e mantemento da presa e encoro de Cecebre.

Décimo terceiro.- O 28 de agosto de 2012 asinouse un convenio de colaboración entre a entidade pública empresarial Augas de Galicia, o Concello da Coruña e a Empresa Municipal Aguas de La Coruña, SA (EMALCSA) para a xestión e explotación da presa e encoro de Cecebre.

A cláusula décimo primeira do convenio subscrito recolle que este ten unha duración coincidente co período da vixencia da concesión outorgada ao Concello da Coruña por resolución da Dirección Xeral de Obras Públicas do Ministerio de Obras Públicas, do 27 de outubro de 1973, quedando supeditado o prazo do convenio a calquera modificación que puidera supoñer unha variación do período concesional previsto.

O artigo 49.h).1ª da Lei 40/2015, do 1 de outubro, do réxime xurídico do sector público dispón que os convenios deberán ter unha duración determinada, que non poderá ser superior a catro anos, salvo que normativamente se prevea un prazo superior.

As partes consideran necesario formalizar un novo convenio de colaboración para actualizar o seu contido e adaptalo deste xeito á regulación en materia de convenios que establece a Lei 40/2015, do 1 de outubro, citada así como á normativa vixente en materia de protección de datos persoais e publicidade

Polo exposto as partes intervenientes formalizan o presente instrumento de coordinación de acordo coas seguintes



CLÁUSULAS

PRIMEIRA. Obxecto

O obxecto deste instrumento de coordinación é o de regular e formalizar os compromisos que asumen a entidade pública empresarial Augas de Galicia e o Concello da Coruña e a Empresa Municipal de Aguas de La Coruña, S.A. (EMALCSA), necesarios para levar a cabo unha correcta xestión, explotación, conservación e mantemento da presa e encoro de Cecebre.

SEGUNDA. Obrigas respecto da explotación da infraestrutura hidráulica.

- O Concello da Coruña, a través da sociedade municipal EMALCSA, asume os dereitos e obrigas da Comunidade Autónoma de Galicia en relación coa presa e encoro de Cecebre, que se derivan da Orde Ministerial do 12 de marzo de 1996 e do título VII do Regulamento de Dominio Público Hidráulico engadido polo artigo único 7 do RD 9/2008, do 11 de xaneiro, así como da cláusula 16 da resolución da Dirección General de Obras Hidráulicas do 24 de setembro de 1973, a cal se lle entrega ao concello para os efectos de facer efectiva esta subrogación, facéndose cargo, a todos os efectos, da realización das funcións que leva consigo a xestión e explotación desta infraestrutura así como dos servizos complementarios que leva aparelados e dos gastos derivados da actividade.

A explotación levarase a cabo con estrito cumprimento de toda normativa e lexislación sectorial ditada en materia de augas, seguridade de presas e encoros e protección do medioambiente e a lexislación en materia de pesca fluvial, industrial e medioambiental en vigor, así como á normativa que poida ditalarse nestes ámbitos con posterioridade.

Dentro das obrigas en materia de seguridade correspóndelle a cobertura dos riscos que a xestión e explotación da presa implica así como a designación do director de explotación e do equipo técnico garante da adecuada aplicación das condicións de seguridade.



A estes efectos concertará os seguros necesarios para a cobertura completa e permanente de todos os riscos que supón a explotación da presa, tanto en situacións normais como extraordinarias, respondendo subsidiariamente no caso de existir déficit na cobertura concertada e resultar esta insuficiente. Nas pólizas que se contraten deberán figurar como asegurados a sociedade municipal EMALCSA, o Concello da Coruña e a entidade Augas de Galicia, debendo remitirse copia da documentación onde se consignen todas as condicións pactadas aos asegurados, no menor prazo de tempo posible, unha vez formalizadas as actuacións correspondentes.

- *A Entidade Pública Empresarial Augas de Galicia* exercerá as funcións de vixilancia e supervisión sobre o dominio público hidráulico e as atribucións en materia de control de calidade do recurso, así como os poderes de policía necesarios para asegurar a correcta explotación das infraestruturas hidráulicas, de acordo coas competencias autonómicas da Xunta de Galicia e desta Entidade e no marco das facultades que lle concede a Lei 9/2010, do 4 de novembro, de augas de Galicia e do Decreto 32/2012, do 12 de xaneiro, polo que se aproba o seu Estatuto así como a normativa xeral en materia de augas, o Texto refundido da Lei de Augas, aprobado polo Real Decreto Legislativo 1/2001 e os seus regulamentos de desenvolvemento.

TERCEIRA. Taxa para as obras de regulación dos recursos hídricos. Financiamento e forma de pagamento.

A obra de regulación de Cecebre xestionarase polo concello de A Coruña polo que se constata a non realización do feito impositivo da taxa, e, en consecuencia, o concello non se verá obrigado ao seu pagamento, conforme ao establecido pola Lei 6/2003, do 9 de decembro, de taxas, prezos e exaccións reguladoras da Comunidade Autónoma de Galicia, da taxa para as obras de regulación de recursos hídricos.



CUARTA. Dispositivo de remonte.

Augas de Galicia impulsará a construción e instalación do capturadoiro para peixes ao que se fai referencia no apartado noveno da parte expositiva deste convenio, de xeito que se consiga o obxectivo de salvar o obstáculo que a presa supón para as especies piscícolas e se de cumprimento ao requisito esixido no condicionado concesional.

QUINTA. Aproveitamento hidroeléctrico.

O Concello da Coruña e a sociedade EMALCSA comprométense a acordar a solución mais favorable para a coordinación e realización dos intereses dos titulares dos dereitos concesionais outorgados ao propio Concello e á sociedade Minicentrales Eléctricas de Galicia, S.L..

SEXTA. Sistema de abastecemento de A Coruña.

O Concello da Coruña e a sociedade EMALCSA iniciarán, ante a Entidade Pública Empresarial Augas de Galicia, os trámites precisos, de conformidade coa normativa vixente, para a adecuación da concesión de abastecemento ao subministro supramunicipal coa posibilidade de aproveitamento da capacidade de regulación do lago do oco da mina de Meirama, como reserva de auga adicional que aumentaría a garantía de abastecemento do sistema.

SÉTIMA. Cesión da titularidade.

As partes intervenientes consideran que para optimizar a xestión desta infraestrutura hidráulica, de xeito que se acade mais eficiencia e coordinación na súa explotación e se evite a produción dos conflitos ou incidencias que poden xurdir polas distintas competencias concorrentes, é precisa a atribución da titularidade da mesma ao concello de A Coruña, e manifestan o seu interese por conseguir este obxectivo.



Neste senso, a Entidade Pública Empresarial Augas de Galicia, no seu ámbito, comprométese a desenvolver as actuacións e intervencións necesarias co fin último de formalizar un futuro acordo de cesión da titularidade ao concello de A Coruña da presa e encoro de Cecebre, instrumento que substituiría, coa súa efectividade, ao presente convenio.

OITAVA. Compromiso de mutua colaboración.

As partes asinantes comprométense a prestar a máxima colaboración para a consecución dos obxectivos que de común acordo se definen no presente convenio así como calquera outro obxectivo común que xurda coa finalidade de acadar unha xestión óptima desta obra hidráulica e de garantir a explotación e protección adecuada do recurso hídrico.

NOVENA. Comisión de Seguimento

Créase unha Comisión Mixta de Coordinación e Seguimento do presente convenio que estará integrada por catro representantes, un do Concello da Coruña, un da sociedade EMALCSA, e dous da Entidade Pública Empresarial Augas de Galicia, designados por cada unha das partes, respectivamente. As funcións da comisión serán as de seguimento, resolución dos problemas derivados da súa execución e proposta aos órganos competentes da resolución de conflitos que poidan xurdir.

DÉCIMA. Vixencia

Este instrumento produce efectos desde o día da súa sinatura e terá vixencia durante 4 anos, podendo ser prorrogado por mutuo acordo das partes por catro anos máis.

DÉCIMO PRIMEIRA. Resolución do Convenio.

O presente convenio poderá ser resolto por calquera das seguintes causas:

- O mutuo acordo das partes.



- O incumprimento das cláusulas do Convenio, previa denuncia dunha das partes, o que se lles deberá comunicar á outra con tres meses de antelación.
- Polo cumprimento do prazo de vixencia da concesión de auga á que se vincula o Convenio así como pola perda, reversión, caducidade ou calquera outra causa de extinción da mesma.

DÉCIMO SEGUNDA. Réxime de resolución de conflitos

As partes comprométense a intentar resolver extraxudicialmente, no seo da Comisión, calquera conflito que poida xurdir na interpretación e execución do presente convenio. No caso de que non for posible, as partes acudirán á xurisdición contencioso-administrativa.

DÉCIMO TERCEIRA. Protección de datos de carácter persoal

As partes asinantes obríganse ao cumprimento do Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), da Lei Orgánica 3/2018, de 5 de decembro, de Protección de datos persoais e garantía dos dereitos dixitais e demais normativa vixente de aplicación en cada momento en materia de protección de datos.

DÉCIMO CUARTA. Publicidade

As partes asinantes consenten expresamente a inclusión e a publicidade dos seus datos persoais e demais especificacións recollidas neste convenio, no Portal de transparencia e Goberno aberto e no Rexistro de Convenios da Xunta de Galicia, de acordo co establecido no artigo 15 da Lei 1/2016, do 18 de xaneiro, de transparencia e bo goberno, e no Decreto 126/2006, do 20 de xullo, polo que se regula o Rexistro de Convenios da Xunta de Galicia.



E para que así conste, en proba de conformidade coas cláusulas deste convenio, as partes asinan electronicamente este documento.

A presidenta de Augas de Galicia, Ethel María Vázquez Mourelle

A alcaldesa do Concello da Coruña e presidenta da Empresa Municipal Aguas de La Coruña, SA, Inés Rey García

